



Maro ihany ny zava-boalazan'ny Filohampirenena Andry Rajoelina, ny alin'ny alahady 8 aogositra 2021. Samy nandray izay hitany fa mety hasarika ny mpihaino, ny mijery sy ny mpamaky, ny mpikirakira vaovao isan-kazarany.

Eo amin'ny fanaovan-gazety matihanina dia misy ny fitenin'i Beaumarchais (1732-1799), mpamorona tantara an-tsehatra sy mpanotra frantsay, hoe : «les faits sont sacrés, les commentaires sont libres ». Izany hoe afaka milaza sy manoratra izay eritreretiny daholo ny tsirairay eo anatrehina tranga, fa kosa tokony tsy mamorona na koa mandainga ka mandiso ny zava-nisy na voateny marina.

Hatramin'izay moa dia vahiny hatrany no nanoratra ny Tantaran'i Madagasikara. Ary dia fijery tandrefana foana -tsy ho lazaiko hoe fijerina mpanjanaka- no nibahana ary mbola mibahana, hatreto. Tsy nisy nanatrika izany raharaha 1947 izany isika velona amin'izao fotoana izao ; maro no mbola tsy teraka tamin'ny raharaha 1972 ary indrindra tamin'ny raharaha namonoana ny Kolonely Richard Ratsimandrava, ny 11 fabroary 1975. Ny tenako manokana moa dia mbola nianatra tany am-pita tamin'io fotoana maloka ho an'ny firenena io... Tsy misy mahalala, na koa sahy miteny ny zava-nisy marina any ka mionona amina tsaho sy zava-poronina hatrany ny vahoaka malagasy sy ny taranany.

Fa amin'izao taon-jato faha-XXI izao kosa, dia tsy manaiky -ary tokony tsy hanaiky- izany intsony isika eo anatrehin'ny teknolojia ny fampitam-baovao afahana mandre, mamaky sy mahita ny teny rehetra voalaza marina.

